

解

春

集

詩

鈔

解春集詩鈔目錄

卷一

人日糧儲大參何公招游西湖竟日同淮陰杜湘
草大梁周雪客以舫名春浮分韻二首

贈盛郎中四首

荅宗人

春雨登樓曉望

題諸葛武侯畫像

贈桃源老隱

觀統國圖歌

題周參軍雪客廬山乞食圖六首

送山陽劉行人文起奉
詔頒赦北還省母

賦得樓觀滄海日

題何公子書劍圖

角子言金
童子胡盧諸顙戲作

暮春晚步蘇隄書事因憶杜黃鸝

望雨

入樊中登後樂山望千竿園有懷

雙鹿

齒痛

夜讀左傳有感

遊子行責山西田秀才

送僧歸廬山

題吳石蒼納涼圖

齊威贊

青門公六十初度賦贈

六月十八日喜雨作二首

李白山喪聰慧兒書此慰之

書湖上所見二首

畢二從征出塞寄贈

北征大捷五首

送宋懷斯歸敘州

題金谷園畫障二首

秋風起不寐作

八月十五夜場屋聞雁

題熊生三緘圖

放榜夜自笑

吳寶崖試卷呈堂主司黜之書慰

秋夕過北郭汪園懷寓昭兼憶舊遊二首

山陽邱念祖舉孝廉却寄

條籠雙白鸚鵡時有凌霄之意感而賦此

逐鹿行

周節婦

亾友金柱臣妻劉苦節無依予冬存其廬悲傷有

作

夜郎人來寄寓昭一絕

錢局牛鳴

冬夕與吳天濤汪少孤飲觀我軒登山看月

簡慰天濤

仲冬望夕復同汪吳飲觀我軒看月次天濤韻

贈顧企賢

卷二

早春載酒游湖上 望孤山作

阿生粗解論語賞之以果

湯西厓典試貴州歸里遺予永綦雄精荅之以詩
湖畔麗人呼舟同載 讀酷吏傳

苦雨三首

西園連理藤趙公子斫製爲杖戲贈

三月三日同袁謝遊 題柳樓思婦圖

風鳶有剪紙爲宰官駕車直入雲際者戲成二絕
新霽夜放燈鳶 冰子羨銅山書此曉之

寒食遊西湖竟日 山墩掃墓歸舟書懷

望前一夕飲問心居與諸子賭決明日陰晴

望日果雨諸子出酒肴相餉

蔣荆名七十醉吟和 題九龍畫圖

乞顧生畫山水 聽黃生彈琴

雨中游西湖 醉舞雙棒戲成

西園桃花一本二色 閒步西園主人畱酌

惜春 閏三月朔日有食之

桃花爲頑童搖落 與諸子再酌西園

辭青門學士別業卜居木場巷

題南溟子醉讀圖 題囊琴趺坐圖

題孫霜瞻垂釣圖

池中科斗聚游如墨童子置而陸曬之因示

袁去塵跛而縮頭謔之致愠飲酒解嘲

游孤山

閏三月三日

遷居二首

趙三公子年方壯而舉七子有贈

春盡喜晴夕登水閣送孫大東歸

夕與諸公飲月下賞牡丹用前韻

題皇甫雄赴友難圖

二美覲入樊禳病同舍郎約觀不往

立夏夕會飲後樂山看月聞笛卽席分韻

月夜與諸寓公步觀我軒拈令品茶石榴花下

歎劍

主孟之疾深矣占言壽永有慨

寄懷鐵夫人時住焦山

苦雨贈方爰甫
端午書懷

蕭山歸雅軒夜集贈張吳陸三子

輓施使
金侯餉米

題吳生擊壺圖

卷三

題乘龍圖

題西溪畫二首

祥文上人視主孟病
賣珠兒墮水戲成二首

題程生畫九龍圖

江邨學士終養歸卻寄

臥病杜門作

南齋遣興七首

題轉菴上人小影

題仇十洲畫猿

春日同吳沈二子數飲閒閒軒雜詠六首

暮春遊閒閒軒書示學徒

題高雲客鶴券圖

園中有捕蛙蛇者口拈戒之

表節詩

銅鑲烏几爲同舍郎換去戲成二首

富平王謙若坐椅爲同舍郎竊去換以破藤戲成

不平三首

戲友卜財

題柴陞升舉杯白眼望青天圖

清冷泉月光

烈女孫秀姑歌

秋生一女名之曰祥兆

送方伯出獵

秋日醉登湖山絕頂同趙公子作

方伯以陝揚十三經送貯杭州府學喜而作歌

藩中夜祭靈星以祈穀

傅秀才以貧故辭婚中表戲書慰之

吳寶崖四十自壽六首次韻

再次前韻六首寄寶崖

漫興六首仍次前韻寄寶崖

望晴

入冬見無衣食人甚多愴然有作

夢沈方舟索筆戲書

湯西崖妻劉輓辭用東坡挽孔毅父妻韻

寄雲客述意時游甬東并索近著四首

十月望日有懷彭無山先生

短歌風蕭山令

客自北來言優孟事二首

觀八陣圖有感老杜遺恨失吞吳之句

除夕戲題十美圖三絕句

題三望圖

解春集詩鈔卷一

錢塘 馮 景 山公

自序曰樊中者何藩中也藩則曷爲曰樊曰樊藩也爾雅釋言云爾折柳樊圃詩註因之予自康熙丙子迄戊寅縻於茲三稔神非不王也蓋若澤雉之畜然時復鷺然而鳴人懷好音得詩文如千首遂存而不逸文別錄詩從雲客評他評則字以別之凡三卷

○評不錄

詩六十四首

時丙子年春讀書千竿園夏初天水方伯固邀入幙作

人日糧儲大參何公招游西湖竟日同淮陰杜湘

草大梁周雪客以舫名春浮分韻二首

雪霽風柔鳥哢春
茲遊眞屬最良辰
舟因訪友還頻泊
酒爲看山不記巡
佛寺舊名尋瑪瑙
岳墳新築拜麒麟
雷連勝地都堪詠
一路梅花更可人

芝草何須覓祖洲
六橋景色勝丹邱
遊山屐印雪花軟
調水符牽澗藻浮
淮海詞人老蘊藉
大梁公子醉夷猶
使君好客無時倦
不待桃開秉燭遊

贈盛郎中四首

并序

去年冬邂逅盛君誠齋于吳山僧舍
雖齒危髮秀而蒼顏映麗但重聽耳
自言耄年寄客禁齡久之

然子每過見其服饌華侈非倦遊者於其歸賦此
贈之

五鹿三鳥過便忘異書曾記讀聊蒼如君九牧知名氏
愧我新交盛孝章

綴帽光搖青亞姑伊蒲饌飽紫瓊腴一逢白社榮孫楚
好事爭傳威輦圖

甲旦來闕門吐肩苔龕香裊曼陀青紅裊錦髻周弘正
也踞精藍看講經

三耳雞冠笑此名那煩蟻闌詫牛鳴此中自有兜牟國
不礙雙童駕犢行

答宗人

吾翁卽若翁疇昔一日三顧疾病中卿兄猶我兄

本趙子龍

答趙範語

今茲三旬九食緩急通異姓尙然明施報何況而

我同厥宗今人薄惡忘舊故一本猶自立門戶乾餱失
德時操戈三歎角弓及杖杜卿今報我黃絹辭繆以豪
俠名歸之譬如燎原總不著螢火萬點燒須彌

春雨登樓曉望

濛濛春雨洗烟鬟雲障遙空萬象閒獨上高樓迷曉望
夜來飛去鳳凰山

題諸葛武侯畫像

管蕭真不忝

陳壽評

伊呂豈虛稱

彭義與孔明書足下當世伊呂也

誰料

英雄主終同劉景升

贈桃源老隱

戴笠夫須勝切雲覆檐狼尾

爾雅注似茅今覆屋

代魚鱗都忘歲

月不知漢但閱桃花三百春

觀虢國圖歌

虢國夫人淡掃眉玉顏不屑汗胭脂
兄妹貴寵震天下隊合往往五色迷
爛若萬花繡川谷導以劔南新旌旗
遺鈿墮鳥擲瓊琲狼藉滿路總不知
五家第宅擬宮禁珍奇貢獻分諸姨
丞相竝驅葵百炬不避人笑雄狐綏

出入掖庭歷公主那知樂極還生悲鞞鼓轟天漁陽至
魚鳧鳥道高險巖紫茵裹屍除禍本姊妹先後黃泉隨
爾時號國棄富貴亦有奔走陳倉時陳倉縣令好男子
義憤誅淫卒吏追棄馬走林到不死賊乎國乎問何癡
賊與國家互有之吏荅殊妙耐人思昔年繁華真須與
好花妖豔狂風吹開元天子幾上治太平誰致亂者誰
披圖見此傾城姿感激往事怒復嗤詩不妄作要垂戒
竊比長恨連昌辭

題周參軍雪客廬山乞食圖六首

圖畫神衣持鉢

幽討縱觀天子障

山海經廬山曰天子障

匡泉千丈滌塵胸憑他

界破青山色都卷銀河入鉢中

匡廬三嶺接空青
嶄絕崢嶸人罕經
太史公遊曾造極
君今躡跡涉天庭

五斗淒涼干祿微
青袍不敵水田衣
侏儒飽死真無謂
曼倩先生本樂饑

不願烹鯖出五侯
一瓢一鉢自風流
金堂玉饌擔憂甚
羨爾千山握粟遊

髣髴魚山白足僧
忽傳面目到西陵
岐方易驗難醫熱
展此寒生萬壑冰

已上廬山三石梁
忽然如指變虹長
仙人坐桂畱吳猛

休竊瓊杯甘露漿

事詳薄陽記

送山陽劉行人文起奉 詔頒赦北還省母

夜封三錢鶴書下嘉平四出輜軒駕向吳分野使星明
行人來溯頒恩赦宣揚 上德挾纘溫協風處處飄青
旂窮檐寒谷春皆滿樂比中衢置酒樽直須兩峰削作
鷓鴣杓西湖便釀蒲萄綠南國大酺士女歡行人真是
豐年玉使館弛橐十日留六橋花柳烟光浮玉簫金管
青雀舟香車寶馬隄上游此間風景差不惡行人耿耿
猶隱憂憂兵飽食夜作賊衙官褭手捉不得 天子仁
聖百姓醇惟有此風卒難革我聞斯語心忡忡高閑厚

牆猶伏戎爲虺弗摧蛇毒螫馴致其道安所終狂生大
呼人盡聳徒存渺論荒文中三年曠隔行人面高軒枉
顧蒙深眷未怪貧來白眼多翻夸老至蒼毫健因述上
元道過淮歸覲慈幃歌南陔 君言不宿趣就道畢事
來諗良可懷旋艫計程那容緩逆數歸期三月半春深
麥秀白蝶飛日暮江迴碧山轉朝衫徑作老萊衣壽母
飲和顏色怡櫻桃初熟鮓魚肥燒尾食單香馡馡以供
甘旨樂不樂小人有母食麤惡負郭田荒聊代耕長安
米貴終難索送君北首立河梁桃花萬點啼鳥黃努力
登朝我老牖更期後會春花苑

賦得樓觀滄海日

大海迷一沫齊州封九烟鴻濛疑未剖雲水遠相連傑
閣凌虛出高臺絕險懸碧城圍十二丹級上三千逸景
龍方睡含芒烏未騫陰霾散蒙汜沐浴出甘泉

帝俊妻羲和生

十日常浴于甘泉出山海經

霞裏瑛盤赤波分火齊圓金輪俄吐半

頽卵忽呈全自旭移亭午將晡迄大遷魯陽揮晚矣夸
父渴終焉遐矚渾無地栖神別有天何年到日觀獨立
泰山巔

題何公子書劍圖

我有長鋏無處彈讀書萬卷冬衣單公子翩翩最豪舉

熟此二物如弄丸劒一人敵不足學書記姓名猶可觀
我欲從君倚天外豈肯瑟縮終儒冠春遊碧山碧秋醉
丹楓丹有時舞玉欄四壁電合龍蛇蟠有時展縹帙千
年傀儡重登壇左文右武及時用白日一去揮戈難

童子胡盧諸韻戲作

東西南北繞諸毛潞泳君猶髭兩髦若使于思盡纏帛
笑聲應比士龍高

暮春晚步蘇隄書事因憶杜黃鸝

湘草詠黃鸝得名

水色接藍山半青晚鐘徐動落霞明美人弄春映花立
浪子聽歌沿月行蚱蜢舟中魚換酒櫻桃樹下馬奔城

此時最憶淮南客不詠黃鸝亦繫情

望雨

福習

麥神名

枯黃霽殖

荳神名

焦赤雲如火燎原燒吾家樹

德方高臥

雨師名馮修號曰樹德見雲笈七籤

小馬黃冠慶忌驕

本龍非子

入樊中登後樂山望千竿園

糧儲署

有懷

瓦綠魚鱗竹屋低虹梁高互絕攀躋倒垂柏葉張青蓋
亂點薇花簇紫霓仙跡當年松化石

南宋物

祥徵昨夜鹿

生麝蓬壺咫尺仙凡隔風動琅玕望欲迷

雙鹿

并序

丙子孟夏不雨迄于皋月方伯步禱三日而甘霖

降子始至莫府夜生一鹿甲子日又生一鹿賦雙

鹿詩

孟夏一月晴山農紛怨藟草木自莽莽窮黎饑欲哭久
不舞商羊溝塍變平陸豁達天水公 帝命藩南服麥
黃蠶繭黑緩下催征牘謁兩步泥塘千山出新沐襁褓
競插秧豐年不煩卜東哲通神明長生民共祝紅塵雙
產麕睂心青花簇如畫雲滿身或云降遐福漢有鄭巨
君隨車致霖霖春旱得甘雨白鹿夾雙轂主簿賀吉兆
三公畫車輻梁有吉士瞻夢鹿果多祿此瑞將無同行
爲九州牧筆札日夕煩餽生徒鹿鹿

齒痛

王喬無病狗頭好

本焦貢易林

左第二牙痛不了素餐麤糲

尙難消何況官廚醢魚鳥刀俎至痛供一餐晨鳧夜鯉
羅晶盤老饕大嚼豈不快此時齟齬笑亦難噫吁嘻腐
儒分合飽藜藿垂頭更歎西堂鶴

時鶴亦病

夜讀左傳有感

十二公看幾廢興虛堂月伴讀書燈笑他錢癖如和嶠
也與征南一例稱

遊子行責山西田秀才

親老不歸養卿爲無天地離鄉二十年釜鍾遠其泊况

又鮮弟兄晨昏望誰視曾無銜索悲孤負倚闥淚不見
老萊子華顛學兒戲可憐反哺烏啄粟迴高翅養隆而
敬薄尙云非人類裘馬何翩翩音書亦嬾寄可憶出門
時慈母理衣笥長鍼縫密線遲汝丁寧意故衣棄何許
新衣換佩璫臨岐千萬言今無一字記草枯還再榮人
老不復穉移汝外嬖心去作承歡事詩教本溫和不巷伯
有當詈誰則生空桑昏昏明發寐生當懷令名死當畏
惡謠卿能悔心萌谷風不終棄

送僧歸廬山

量腹聊充松朮饑度形好著薜蘿衣江州子譽若求見

何必便同宗敬微

題吳石蒼納涼圖

火雲燭地天鬱蒸三伏畏見陽烏升我肥非由義戰勝
喘汗思浴秋江澄科頭赤腳北窗臥嗜膚又苦侵蚊蠅
龍皮鵲翅扇難得戲作冷語招諧朋或言齧雪蘇屬國
或言臥冰王休徵或言千里凍窮髮或言七日僵白登
或言太康二年事橋下鶴語伊祁崩就中得句最幽險
不周風黑吹鬼燈相與大笑滌內熱齒牙得利勝飲冰
舒鳧丹鹿二客名善消暑扁舟徑訪魚山僧翠柳百尺障
雲日紅蕖一池雜荇菱爽氣西來支頤受涼風北至披

襟承此時炎歊避襜襜清涼地上聞三乘鑒公靜者復
善畫俗物求之百不膺偶然寫作納涼圖景物生動疑
飛騰文沈之後作者少賞不容口雙眸凝諸公題句各
雅健我續貂尾良堪憎袖中蒼毫老苦禿抽祕自知力
不勝爾時倘邀河朔飲一醉累月吾猶能

齊威贊

戰國賢君齊威乎朝周已與列辟殊封墨又烹阿大夫
不在墨阿明褒誅尤難駢戮毀譽徒勸一風百寒姦諛
比周誰料亾其軀以霸天下不難圖何況區區東海隅
記得佞臣姓名無列女傳云周破胡

青門公六十初度賦贈

天上周卿月人閒漢客星三弘開大業四世紹遺經
褚少孫眞拙嚴彭祖最精麟編勤旨構鯉問篤趨庭書粉
朝乾蠹鄰光夜借螢下帷攻苦久脫穎揣摩成選造春
官楊明揚天子廷廣川三策正永叔萬言誠白虎何
同異靈蛇自縱橫金門方視草玉尺會持衡文體昭星
日人才別渭涇騰霄申尺蠖跋浪起長鯨理學鵝湖貫
箋疏鹿洞明蒲輪徵筆札華轂聚簪纓屈宋宜平視鄒
枚可抗行螭頭旌異等驥尾顯高名朝重揆天藻鄉推
月旦評江山助張說車服錫桓榮八桂搜南粵連茅拔

北平

儲君資豫教卿尹仰賢聲忽斷

音短

犧雞尾還嫌

腐鼠腥一生忠孝篤三黨貨財輕拂袖歸何蚤懸車志
不更青門瓜可種谷口徐堪耕秋水宵飛蝶春山曉聽
鶯觀魚原潑潑伐木果丁丁世態風飄籜生涯雨打萍
丰標同嶽峙度量若淵停唾面能無校磨牙屢息爭遂
消蠻觸戰竟卻魯陽兵止止生虛白陳陳發汗青昌明
劉子政淹博趙臺卿鈴槩揚亭密蓬蒿蔣徑局新編還
駕宋通志直垂清彤管芬三簋黃金賤一簞平淵龍
是子弄玉鳳爲甥花縣皆餘慶芸窗總寧馨此時勤伏
案他日早書屏賤子才華薄明公禮數盈卹成分宅諒

張喬買田情華屋經年底醇醪竟夕傾渭人千里馬上
客五侯鯖敢倚知交盛空傳姓氏驚解驂來越石執轡
下侯羸凡定文章價何曾甲乙榮乍親能置腹久敬亦
忘形義諦偏精解清談每樂聽貝多參半偈蓮漏悟無
生海上沙鷗集池邊野雁烹安心脩止觀俗慮不撓寧
別墅逃炎暑澄湖濯晚晴香山添逸老洛社匹耆英芝
草三莖秀菖蒲九節靈正堪河朔飲絕勝狄希醺輞水
開摩詰鄰翁約老彭與彭觀察鄰
彭亦老壽陶然醉懷葛此訣是
修齡

六月十八日喜雨作二首

大雨沛三日旱魃逃不畱池魚撇波躍直上階心游北
風吞廣廊盛夏如涼秋不愁月令改且慰農人求
夏寒雨未歇苔階水中沈蒼蠅不耐冷白鶴方鳴陰萬
彙奪炎勢一昔含秋心雷風亦何常缺月懸高林

李白山喪聰慧兒書此慰之

桑樹東垣去未迷蘭摧那解艾榮悲金環若索君須乞
音氣羊祐前身是此兒

書湖上所見二首

霓裳女兒玉簪花畱仙裙染金灘沙晉人傳言織女死
爲之著服素縠紗白楊蕭蕭吹故絮鬼車雙飛掠鬢去

孟家德曜肥而黑賈氏南風短又青休笑阿承黃髮女
宿瘤千古勝娉婷

畢二從征出塞寄贈

聖人籌邊振長策會須滅此方朝食百年逋寇在門庭
一奮天威爭獻馘我夢彼酋狼咬腳君料渠魁豕鬣
膝華陰赤土拭干將紫氣星光騰劒脊斬郅支首懸藁
街此功莫讓他人得歸洗甲兵包虎皮定給鼓吹拜龍
額長鎗大戟吾不能尙有毛椎紀奇績

北征大捷五首

魯倫秋駕六蒼龍大將從征門鑿凶一指天戈戮鯨首

三年撻伐笑高宗

絕幕揚威自將邊
蜺旌霜鎧耀祁連
天山外胭脂女
高奉壺漿跪馬前

焚旗熾火逐烟銷
昆莫庭空少射鵰
魚甲雲都齊奏凱
從今東矢詠弓弨

天子臨戎自有真
決幾制勝動如神
秀支替戾岡譯言
無敵譯言禿當譯言聲展相輪譯言

告廟陳俘警不庭
策勳蹀血信丹青
鯁生空挾蒼毫健
未得燕然一勒銘

送宋懷斯歸敘州

蒹葭浥露欲零霜春至秋歸蜀道長好馬月題騰夜白
奇書犀照束膠蒼危機畫卯雕薪伏鄉味青烏芋雁騰
菰米也香我贈文無當歸良有意萊衣早慰倚閭望
見管子

題金谷園畫障二首

麤豪誰似石齊奴賈禍都緣嬖綠珠十五人同斬東市
血流紅似碎珊瑚

蒼頭八百妓駢羅玉粒經宵忽化螺方悔連雲錦步障
不如甕牖保身多

秋風起不寐作

客舍未成塞戶計閨人應動授衣情飄飄落葉不知處

寂寂空山如有聲，立豹飛迴孤帳迴。
寒蟬啼旁小燈輕，一聞天籟淒殘月。
夢斷清宵白髮生。

八月十五夜場屋聞雁

對策五千言，主司例不看野夫。
必盡誠正書，遂達旦圓月。
如金盆彩雲細零亂，十千魚鱗屋燭光。
動星漢角吹明遠樓，二更人盡散。
我方疲左肘脫藁，未及半懷故歡宴。
人青霄引杯玩推排，十許年仰屋起長歎。
窮達固有命，苦爲浮名絆孤鴻。
鳴天衢漸達從此斷。

題熊生三絨圖

吐喉常斥諱，捫舌亦非情。
只有安生好，時稱觸觸生。

熊安

生事詳
北史

放榜夜自笑

三更鼓角動慈楊發何速道北聞喧
廋道南響剝啄蓬門久寂寂奴猶張
兩目母醒恚搥牀婦起歎仰屋我本
無心人咍臺軒正熟機士王績厭漫
郎元結欲進退有餘裕吉凶互倚伏
放言劉去華有學唐衢哭

吳寶崖試卷呈堂主司黜之書慰

吳子心純白磊落非常人文章復佳
妙屢屈不得申世皆愛脂粉不解貴
天真譬彼西子妍笑亦不厭翠亦有
邢夫人故衣冠羣嬪黃金買畫師可
惜吳子貧主司太

冬烘藻鑒迷人倫胸無數卷書芳潤多遭噴國語未曾
讀文選封埃塵吳子用
二書黜少見故多怪蜀犬宜狺狺羣驚
飽騰槽伏櫪饑騏驎捷足原非才仰首羞搖脣遇合會
有時兩刖終當珍良工不示朴丈夫患無身風雲起潛
蛟變化誰能馴

秋夕過北郭汪園懷寓昭

時爲鎮
遠令

兼憶舊遊二首

芙蓉隔水望依稀倚徙閒園戀夕暉三徑荒涼誰是主
一船破漏亦無依長橋雨過蜻蜒舞高閣人空蝙蝠飛
深鎖松筠滿鷗糞夜郎薄宦幾時歸

昔日繁花水綠波蘭橈泛酒雜笙歌黃頭起擊靈鼉鼓

紅袖坐翻鸚鵡螺一失春鶯遊屐少祇今秋蝶女牆多
風臺月榭皆陳迹惆悵疎星點薜蘿

山陽邱念祖舉孝廉却寄

春花不敵秋花馨年年八月愁飄零淮南叢桂小山發
天香夜落西軒屏問字者誰邱念祖侍予十載傳葩經
揮毫伏几千氣象執卷倚柱忘雷霆洗馬名德重宇內
歸田式穀身作型名父之子不患祿要以家學述紹庭
友愛姜肱必其被溫恭崔瑗常書銘所學旣成脫穎出
如豹撥霧鵬徙溟明年選造春官榜計日對揚天子
廷老生自顧蹶然笑染藍何必皆由青異書祕記充松

棟天祿石渠開不扃從此鳳池一飛藻超宗故有丹山
翎三十中郎致身早數言忠告須敬聽養心慎勿還聲
色擇交母受奸諛熒顛毛種種吾已老子若干將新發
硎得志豈徒足溫飽要以道濟天下寧聞捷色喜夜不
寐剡溪藤走龍蛇形

條籠雙白鸚鵡時有凌霄之意感而賦此

雪衣孃子白頭翁名號雖殊玉質同一飽金籠雲路隔
可憐黃鵠下秋風

逐鹿行

鯉魚風起登高臺牡麋觚角摘石摧我乍見之忽心動

亟語鋸角休裴伺主人猶豫不關慮有頃隔垣呼號哀
童奴如廁脫窮袴二鹿騰前挽復推中有巨麋低厥角
掀尻而起欺嬰孩不須永平七星挺三角一一蹄踏蓮
花開

用提婆延
鹿女事

破膚舉體遍流血何異產褥新離胎焦

頭爛額悔無及徒薪先見眞恢恢主孟傳言亟逐鹿鹿
鋌走險聲喧厖厥罪輕者截兩角武士急縛誅其魁有
客奔救已剖臧劉燼無草尋陳荻

劉燼草一
名鹿活

肉可作脯

皮可寢童數顛髓招魂回宛轉牀第亦良苦疇昔彊梁
安在哉噫吁嘻災人不災徒自災作歌垂戒聲如雷

周節婦 有引

節婦沈氏子中表妹也嫁夫一載而夫亡遺腹子
又亡苦節無依賦此美之

小時謁舅識儀容一嫁周郎類轉蓬白粉蛾兒粘曲薄
婦勤蠶績紅絲蟾子織方空立身真似梁高行遺腹終亡鄭
小同松柏久於冰雪耐不隨弱草綠春風

亡友金柱臣妻劉苦節無依子冬存其廬悲傷有
作

金子昔吾友道合如弟昆古貌自落穆貧交無黨援長
愁復多病天損傷其根中壽亦未得齋志竟何言室有
糟糠妻晝哭及黃昏家徒四壁立而又無子孫一女相

與依壻賈離家園蒼頭瞽雙目永日扃柴門我行存其
廬靜似深山村戶有蠨蛸結庭無鳥雀喧再拜靈牀頭
寡婦戒勿煩隔帷遙致詞聞語知啼痕一言痛淪心再
言謝枉存炊煙絕累日餓死安足論悲酸不忍聽古道
誰爲敦同盟六七八人強半登華軒嗟我室再燬失木如
窮猿連年困衣食方曉錢財尊勉致五斗米聊充養與
飡絮衣雖麤布尚可謀冬溫門徒亦夥頤無人解報恩
傷心作此歌歌成聲已吞

夜郎人來得寓昭消息却寄一絕

碧箐紅崖龍里蠻話君爲政甚清閒凝香宴坐聽秋雨

好句多吟銅鼓山

錢局牛鳴

紫紺錢頒新鑄成人爭末利厭春耕郭椒丁爍

牛也本桓譚新

論

閒無用袁正辭家偶一鳴

五代史袁正辭積錢盈室室中常有聲如牛

冬夕與吳天濤汪少孤飲觀我軒登山看月

枯樹蕭森滿棲鳥西園月色金盆皎人聲闕寂鶴夢成
羣鹿山頭立悄悄丹霞如火照西方一陽未復主何兆
汪吳胸中有鴻寶走問不荅醉綠醺握手登山極望遙
寒星數點落深沼近眺軒中虬榦奇遠看湖上螺峯小
天風吹衣難久留依然復路天如曉月盈必吳吳復盈

只愁時過人將老何必蘭亭感陳迹何必酒壚思舊好
別君此去樂蓬蓬麟洲一夜生春草

簡慰天濤

先生仰面歎華屋手抱遺經常獨宿盡日集庭間鳥呼
中宵掀窗來鹿觸我常踞月望西園寒星寂寞垂短垣
徑約汪君信闊步青田壺瀉三崑崙

鶴名

清言若遇王平

子絕倒當年定如此稽古豈無春卿榮隨學尙有公超

市先生不樂

句

羞素餐先生毋躁

句

且少安晝居于內

侍湯藥不然詎肯輕儒冠病鶴支離堪對語翩翩平原
在何許

仲冬望夕復同汪吳飲觀我軒看月次天濤韻

朱霞半天散無跡千山萬山烟光白天相搖芒櫪馬嘶
猶喜處士星黃澤今夕冰輪異常格酒人入室開瓊液
切鴨分鰲佐晚肴三人共醉青松側鹿去安眠天自全
鶴來起舞情尤適罷酒登山寄幽討千年松枝化爲石
萬物變化何所無紅顏白頭幾朝夕但得時和朋好偕
醉月年年吾願畢

贈顧企賢

老來却掃畏疲茶頗息交游謝負笈不逢元歎賞蔡邕
但見荆卿嘖蓋聶獨有顧子秀安帖我愛其人常屢接

奏刀繆篆最精良吮墨畫苑亦涉獵弱冠文史日充腹
每敬高人必往揖作詩刻苦嘔錦心得句神奇穿月脅
劉晝癡如疥駱駝魏收輕比驚蛺蝶如子多才雅且馴
交可忘年素心愜

解春集詩鈔卷一

解春集詩鈔卷二

錢塘 馮 景 山 公

詩五十八首

丁丑年作

蚤春載酒游湖上

東風一夜染羣山
遠綠空藍極望閒
從此三春遊屐動
何曾隔日酒杯閒
噴珠波面跳青鯽
擲玉亭心飛白鷗
萬物盡饒生意好
吾衰遮莫放朱顏

望孤山作

有屹者碑孤山墳
孤山草碧風吹薰
無端涕零思古人
仰看清都飛白雲
管仲侈陳封禪君
七十有二封亭云

泥金檢玉還鐫文上古淳風尙質樸安得繁儀事華縟
漢兩司馬書皆諛遺棄能玷孤山無

阿生粗解論語賞之以果

九齡頭角已嶷嶷論語粗通亦解頤三世無慙應念祖
一經成誦務求師春卿捧果眞儒者通子爭梨尙小兒
但得汝曹資半部杯中物進更吟詩

湯西崖典試貴州歸里遺予永基雄精荅之以詩
仗節還家榮世觀炎方得士重文壇羨君畫錦前驕盛
念我多絺四壁寒白黑隨人忘定局雌雄齊物勝還丹
良朋持贈箴規切未與珍奇一樣看

湖畔麗人呼舟同載

霞妝星靨出湘簾
淡掃蛾眉羅襪纖
障扇潛行如有意
招舟離坐亦無嫌
挑心未許相如蕩
窺面應知宋玉嚴
底託微波通一盼
也防行雨夢中添

讀酷吏傳

漢傳酷吏周陽由二千石與汲黯侔
乃謂同車不敢均
茵伏紀事失實良史羞君不見長孺
廷折公孫子質責
張湯如叱牛田蚡衛青但一指武帝
見必冠其頭氣高
百代空九州眼中安有么
膺畱貶賢崇姦非細故羣兒
反誚吾苛求

苦雨三首

二月東風刮面寒
坳堂水滿雨漫漫
心悽檐霤中宵瀉
夢破梅花遠墅殘
雲氣黑圍金屈戌
苔痕綠換赤闌干
書生未夢飛天翼
煉石成時補亦難

日馭深藏不可求
雨逢甲子老農愁
河魚大上言方驗
石燕高飛勢未休
斷送柳花吹北牖
飄零桃蕊逐東流
如何青帝翻司坎
狼藉春光送白頭

歲在金穰毀有徵
肅時雨若罰偏恆
蝸涎漫壁縱橫滿
豕蹢涉波躑躅升
箕畢失躔占地潑
荆揚無麥減年登
天門角上思天帝
倒掃霓雲卷萬層

西園連理藤趙公子斫製爲杖戲贈

蝦鬚麟角非連理，斲此駢枝九節供。
何必青蘆方禦火，削成紅肉好驕龍。
終軍奇木誰能對，漢武雄才但覓筇。
過五十年方杖國，不如贈我撞華鍾。

酒
三月三日同袁謝二客遊觀我軒賦詩調公子取

修禊初晴水滿塘，放魚人共樂洋洋。
鼠須筆寫紅花榜，鹿眼籬編黃木香。
才子有毛夸謝鳳，狂夫短足笑袁羊。
我來勝地逢良會，一詠先成待一觴。

題柳樓思婦圖

盧女嫁夫日抱愁夫遊萬里求封侯三年無人寄雙鯉
春深頻倚南陌樓聞說龍城久罷戰飛絮漫天泣嬌面
晚風吹落繡毬花月明獨坐啼周燕

風鳶有剪紙爲宰官駕車直入雲際者戲成二絕
雙輪冉冉碧霄懸執轡依稀香案仙西極化人來最遠
執祛誰更止中天

奇肱民善造飛車吹入陽關十載餘今遇東風送歸去
試教伊尹坐何如

新霽夜放燈鳶

雲淨天空萬里青燈如銅鼓上遙冥五官此夕重占火

三舍今宵定禱焚直貫紫庭驚畢宿若行赤道敵江星
雖然怨坎思離甚分野新添恐不經

冰子羨銅山書此曉之

冰子年年困寒沍難覓荆鞭挂桑樹又乏黃羊祀竈神
銅杆青蠶知何處齊奴富由劫人船海南珊瑚高如椽
可憐綠珠墜樓死八百蒼頭長棄捐所以召禍寧非錢
曷不棄金如土師前賢吳王錢布江淮間白頭舉事何
其頑黃頭登天終餓死銅山未必非冰山

寒食遊西湖竟日

寒食朝晴出郭遊湖光潏灩碧于油杏黃鞦韆躍花閒馬

豆綠衫垂柳外樓蝶舞六橋偏綽約蛙鳴兩部亦風流
如何白日當三月容易西沈散晚舟

山墩掃墓歸舟書懷

宰木虬枝碣蘚斑祭成舟出板橋灣魚牽荇帶流春澗
鳥蹴梨花飄暮山筍蕨初肥浮白好蠶桑未動蹋青閒
不須泛說村居樂守冢吾當老此閒

望前一夕飲問心居與諸子賭決明日陰晴

牆內桃花牆外飛此時不飲負芳菲香醪五斗頻斟酌
明月一輪低壓屏扃陣全輸渾得醉舌鋒競戰各忘歸
統統鼓弱東風勁明日占晴說總非

望日果雨諸子出酒肴相餉

一百五日春光遷何曾杲杲晴十天昨宵決雨咸不信
獨斲占陰豈偶然富平石凍鴨頭美薛澱金鰲魚尾鮮
大嚼未終收雷滴落紅無數鳥啼烟

蔣荊名七十醉吟寄和

閒氣布衣皮襲美江南逸老伍世明兼有二妙復中聖
能頌酒德推先生一飲頽然六十日

阮籍事

螺贏螟蛉忘

在側天地直欲爲庭衢麴糴何妨作枕籍蓬蒿滿徑掃
不開昔惟許我同舉杯春風提壺聽黃鳥騎驢轟飲劉
伶臺

甲戌春

歸來日月不相待淮陽一老思光采忽寄三

洲瑤草來醉吟雕章猶健在雲中雞犬事非眞海上蓬萊居有人先生掉頭總不問日日拍浮松醪春

題九龍畫圖

帝命伯禹作司空大川小川歸海東巨靈鑿山險阻通雷殞電豁騰九龍老龍禿顙睛瞳瞳鱗甲飛動晶光融亢龍高翔蟠蒼穹背脊隆起彎長虹潛龍伏首穿蛟宮鱗鱗鯉鱣鮪從歸墟一龍如睡容珠光出領搖臙臙其餘五龍皆乘風何人收拾尺幅中神筆不讓陳所翁我一見之開心胸氣吞山海包洪濛如今世人多葉公誰作霖雨被九變我欲騎之驚靈靈丈夫氣槩何豪雄

安能吮粉描青紅浪費精神圖草蟲

乞顧生畫山水

兖州八伯誰爲誕

顧生本姓阮

頰上三毫那得癡萬壑千巖

應著我好成安隱布帆圖

聽黃生彈琴時貓有捕鶯意戲作

高檐忽騰紅叱撥深柳欲擒黃栗留游戲未傷春浩浩
休將北鄙七絃收

雨中游西湖

湖山寥廓望中迷白雨如絲失翠微遶樹密雲鶴鵝下
段橋小艇鷺鷥飛萬松嶺上遊人少五柳居

酒店名

中酒

客稀只有綠波垂釣叟櫻蕪簪笠坐漁磯

醉舞雙棒戲成

掣來綵棒

曹操爲洛陽北部尉事

與赤棒

北齊高恭之碎壽陽車事

雙舞氍毹

唱短歌犯禁直行北部撻碎車不放壽陽過方今出塞

誰橫槊異日從戎好荷戈欲棄毛錐師搏擊藍田醉尉

敢誰何

亦作譙詞

西園桃花一本二色

深紅又間淺紅新合璧爭妍兩色勻雙竇青鳧升絳闕

竇子明二女化青鳧仙去見九域志

二喬銅雀鎖深春渡頭根葉何殊晉

洞口桑麻總遼秦誰道佳人遺世立邢夫人竝尹夫人

閒步西園主人畱酌會飲者三輩

日西風動柳絲斜蝶引徐行蹋玉沙藥味最香白荳蔻

時晒藥

春情不動紫薇花

三月尚未發葉

九流雜聚星醫卜二簋

秀陳蟹蛤蝦便撥一醅供薄醉歸來深樹滿棲鷗

惜春

周遭薺菜白花圍爲惜春光數款扉深翠鷓鴣時一舞
淡黃蝴蝶日雙飛游絲易逐輕風遠好月難追前夕肥
莫待海棠憔悴後卻來秉燭想容輝

閏三月朔日有食之

過分未至蝕純乾鼓幣陳辭禱大遷已信 聖朝無弊

政尙疑荒野有遺賢敬消五閤陽愆候德弭三鑄謫見
天更納忠言士文伯時因天變求言罷兵倒靽是豐年

桃花爲頑童搖落

桃花已恨晚風吹誰更飄搖損好枝碧瓦半牆堆礪礪
青苔滿地染胭脂再遊觀裏春殘日同立樓中月落時
一似美人笞掠後紅顏傷刮友通期

與諸子再酌西園

座有崔客

綠穠紅淡草如茵前日飛觴迹已陳斑尾貓馴頻捉展
畫眉鳥熟巧呼賓一年春好重三月兩色花開逢韻人
梨釘烏標拚大酬唐崔遠人號釘座梨不妨酒黨勸桓彬

辭青門學士別業卜居木場巷

邵成分宅兩年留弱喪懷居也自羞鵬鳥暫爲六月息
鷦鷯祇愛一枝幽甃牆加堊新淘井矮屋修梯麤葺樓
從此便堪容膝老掘金燒杵

何文事見搜神記

復何求

題南溟子醉讀圖

讀書常苦饑飲酒得所欲況多下酒物人生至願足彼
顏何爲者喜不著朱襖義勝貌故肥科頭少拘束大鼻
陳孟公投轄困官屬又似賈長頭無書不熟讀好酒書
必荒好書飲不酷二好安得兼兩利無此福君得取舍
法其妙在倚伏沈醉惺簡編枯吟活醅醪觴詠若循環

庶幾樂相續酒人必沈深慶鄉故不俗但恐玉山頽虛
此顏如玉

圖中畫美人斟酒

題囊琴趺坐圖

我非善易好言易君本能琴不鼓琴參得箇中消息透
不煩冷坐九年尋

題孫霜瞻公子垂釣圖

小橋流水竹遮牖掩卷囊琴坐深柳游鯈無數跳波圓
興來偶試絲綸手桃花雨漲肥鰕魚人言此味踰花豬
達人寄興自有在肯爲滋味勞周陆君不見鯢魚朝發
崑崙墟波如連山汨孟諸揚鬐暴顙骨專車試垂大鉤

屬巨緇投轄五十牽何如公子仰天笑不苔坐看雲起
蒼烟合

池中科斗聚游如墨童子置而陸曬之因示

蟾蜍不礙金波躍科斗何妨墨浪盈良苦當年思里革
泗淵能教水蟲成

袁去塵跛而縮頭謔之致慍飲酒解嘲

緩步攜筇似李諧却同屋漏聳肩來面長人重公孫呂
腳短誰誅庾玉臺月榭共欣情話浹花棚更喜好懷開
小嫌介意非豪士一笑須傾五石醅

游孤山

西湖到處變繁華，妝點孤山覺更奢。
古碣忽迷處士墓，新臺如入美人家。
風吹畫壁龍蛇動，日落雕梁燕雀斜。
惆悵幽巖改華屋，況栽芍藥換梅花。

閏三月三日

三旬兩見永和春，重過江頭逢麗人。
修竹更抽十尺長，幽蘭又採一番新。
飛飛黃蝶覓殘蕊，閣閣青蛙泗白蘋。
不獨流觴感陳迹，落花前日已成塵。

遷居二首

三十年來家七遷，大都窮巷蔽疎藩。
讀書未聚公超市，處約誰高通德門。
不礙分庭交鳥履，尙需遶砌種蘭蓀。

從今掃室同江女鄰燭還開四壁昏

把茅蓋頭可終老容膝蝸廬足一廛元凱客皆連榻坐

承明

晉范粲字

老慣就車眠赤脂塗壁人爭侈青瑣連窗我

遲愆嘗惜令聞孟獻子室新美奐未稱賢

趙三公子年方壯而舉七子有贈

七夢雄飛喜氣頻男兒墮地自精神已飛六度虞延練

猶似初摩寶誌麟壯舉汾陽丈夫子老添高密十三人

佛牙斧碎君眞鳳

後唐趙鳳事

也把蓮花驗宿因

公子不喜佛而夢開

七朵蓮故云

春盡喜晴夕登水閣送孫大東歸

九十春光無半晴晚憑水檻綺霞明疎籬漸壯薔薇色
芳草竟吞鶉鴂聲穀雨陰來蜂蜜溼楝花風起燕集成
枕流仰視金波滿漱石愁無孫子荆

夕與諸公飲月下賞牡丹用前韻

天宇浮空散晚晴劉師哥白牡丹名映玉盤明廣庭弄影貓
無賴曲沼跳波魚有聲月窟可探光正滿醉鄉未入夢

先成一歸青帝春無主滿地珊瑚碎紫荆

題皇甫雄

崇禎時人赴友難圖

黑霧吞天風刮地黨人籍中有名字望門投止密告姦
壯士聞之目裂眦龍精夜吼劍吐芒紫氣射天零兮霜

裹三日糧不旋踵黃鬚奚兒牽馬忙鐵象日馳四百里
丈夫一諾輕生死喜救天下無告民好直人閒不平事
借軀報讐義氣真翻雲覆雨性所嗔交情不負張元伯
直道誰訶馬少賓怒抽湛盧血五步立拔窮交出深銅
夜雨狐呼豫讓橋秋星鬼噪荆卿墓君不見湖陽大姓
讐申屠將殺其季追及塗道逢馮魴厲聲叱財物不受
全其軀又不見孫斌奔救第五種遮險格殺太原隴下
馬與種自步行一日一夜足爲腫男兒墮地七尺身活
人之人能殺人安有兩端縮首鼠遇小利害驚逡巡皇
甫暴亢吾所愛袒裼鬪彪常不介何須絲繡古朱家每

披此圖卽堪拜噫噓戲人心險比谿谷深高山大川猶
可時登臨爲渠作歌仰屋笑漢夷長公同此心

二美覲入樊禳病同舍郎約觀不往

越俗從來病尙巫靈談鬼笑儼丹珠

二巫名見晉夏統傳

甘貧仲

御拘蠛蠅可肯怡顏國色無

立夏夕會飲後樂山看月聞笛卽席分韻

櫻筍肥鮮春已除月如斗大上山初香醪共酌紅毛酒
異味新嘗比目魚

皆自洋致

花美喜飛紅蝙蝠詩工苦滴玉

蟾蜍筵前娛客翔三鶴鄰笛還疑李委如

月夜與諸寓公步觀我軒拈令品茶石榴花下

暫聚天涯步廣庭碧天流月淡疎星桐花么鳳迷棲鳥
桑樹青蟲息負蛉博學賈達成酒令高郵賈進士在坐逸情陸
羽著茶經碎紅綃下酬今夕莫闕他年散作萍

歎劍

嘗思天外倚昆吾偶說人情吼湛盧頭白似霜終破晉
脊文如水不歸吳風胡論後龍精顯蓋聶噉時虎氣孤
有一崩縹彈不得大魚入海小魚枯

主孟之疾深矣占言壽永有慨

那得良醫招扁倉三千二百卜荒唐僂句原是最靈物
也學王嘉說未央

寄懷鐵夫上人時住焦山

淮水相逢永夕閒
得聞牛偈破昏頑
三年旅夢窗前雨
一片禪心江上山
白象盡登初地喜
毒龍已受法雲閑
師雖隔面時時見
春燕秋鴻共往還

苦雨贈方爰甫

精醫喜談禪

苦雨連宵困積陰
練川高士共開襟
相攜水閣閒垂釣
獨坐藤牀靜鼓琴
投劑定知醫國手
談禪全得法王心
蠶荒麥爛秧難插
何藥能消四野侵

端午書懷

雨暗天中氣未澄
黃泥赤印茗新登
書郵雜沓人忘節

庖舍清閒客似僧
筒糗菰黏思莫致
蒲龍艾虎見何曾
去年此日雕航裏
猶見仙仙上舞絙

蕭山歸雅軒夜集贈張吳陸三子

君輩天涯久未親
一朝握手得三人
江東著姓才無匹
第一吳公交有神
金鴨爐溫香繞室
玉蛆酒美醉忘巡
南皮朗月雖然好
未抵芝蘭四座春

輓施叟

施父之後四十傳
隋東興侯迄始遷
歷宋元明多象賢
門庭甚盛車馬闐
彼二孝廉何翩翩
乃生叟也尤光前
讀書了了大義宣
天性孝友中帟前
薛包異母弟尤憐

分財讓產無私偏迎養嫠姑三十年育藐諸孤時周旋
窮交緩急不吝錢曼卿三喪贈麥船高義此類難細詮
爲人倜儻非拘攣氣吞五嶽涵百川面責人過期于悛
最喜周處與戴淵五言陶謝性所便偶然得句書錦箋
披鶴氅衣行霜輒金波穆穆低嬋娟一栢在手月在天
人生能見幾回圓勞生劫劫桎梏牽昨日華屋今下泉
苔青骨白封野烟劉伶夜臺酒難咽革囊盛血饗百筵
一息不屬尸蟲纏乃知施伎及時行樂其天全八騶不
敵一醉綠朱提赤仄累百千空手入棺皆舍旃舍旃舍
旃守愈堅何人肯濟翳桑餽伎常焚券宿負謁宜乎有

後皆璣璫人琴俱亡總帳懸小園花開黃鳥妍吾當來
吟讀遺編七子之志誰繼先低徊竟日堪流連只愁雨
敗清池蓮酒壚雖近心茫然

金侯餉米

性不好官欲得米

本晉陳
訓語

此言但可語知心始安太守

遺船餉荅貺吾慙翟道深

題吳生擊壺圖

老馬伏櫪志千里烈士暮年心不已我昔壯歲歌此詩
便惜流光去如矢手無如意供指揮不擊唾壺常擊几
況今顛毛已種種功業無聞老鄉里宛轉生死文字閒

直與蠹魚相終始青雲不徒溟北鯤白頭徒獻遼東豕
轉眼下壽中壽人傷心千言萬言紙撐腸拄腹何所爲
疾首低眉良有以紫薇花開秋月秋夜讀楞嚴通妙理
身滅自有不滅存波斯匿王豁然喜何須更謁耆婆天
寒暑遷流漸如此吳子高才方盛年不難拾芥取青紫
曼倩三千富尺牘惠子五車博經史兼此二妙信軼羣
眼中之人見吳子會惜分陰勉自彊處仲襟懷聊爾爾
信陵公子晚失意日日飲醇近婦女偶一寄情何必同
野人苦憶佳山水

解春集詩鈔卷二

解春集詩鈔卷三

錢塘 馮 景 山公

詩七十九首

戊寅年作

題乘龍圖

君不見六安冶師有陶安忽騎赤龍飛上天又不見漁
陽張堅作天公振策登天乘白龍世人少見多所怪未
能放眼包無外大禹視龍猶蠅蚋氣吞九州不芥蒂小
兒乍覩百足蟲驚駭辟易心如春何況劉累能擾龍幾
人信此開心胸颺風蓬蓬海水立蒼龍怒飛聲霹靂騰
身直上跨脊騎下九青虬仰天泣子羽斬蛟今已無太

白騎鯨事豈誣三歎古人不可作今人空畫乘龍圖

題西溪畫二首

西山西去好林邱臥聽春鶯夢亦幽野寺溪橋人跡少
一篙破綠打魚舟

得魚不賣真成隱拜石能恭詎是顛欲結蝸廬傍衡宇
十年未辦買山錢

祥文上人視主孟病言交春不食新矣果於正月
初十日卒有謗其妖妄者書此曉之

西方之國有化人不知喜怒無冬春空生大覺度羣有
視一去來如浮塵清明在躬志氣神此理吾儒久相因

可笑羣兒墮雲霧明明定命生疑嗔上人偶饒廣長舌
感以誠通非數術從來龜策與筵筭皆有神明不可斥
君不見廬江韓友善占卜兼行厭勝救危篤狐毛縛囊
消二斤野豬畫屏瘳一宿又不見吳興戴洋善風角決
人命終最奇確顧榮果卒歲嘉平周珮不及中秋朔祥
公大似佛圖澄心有智珠真神僧阿彌不復療殷騰龜
生黃河桓溫興夢羊負魚鮮卑升胡子洛度臭可憎脇
下有賊十日應所言皆讐信有徵舊裏醯雞見何曾往
往不信井水生火溫泉冰願反詰我因果在何處荅云
出門且認東西路

賣珠兒墮水戲成二首

冰子困寒同彥伯
溺人必笑類孫登
若逢泉客傳方法
出淚成珠顆顆凝

欲攫多珠滄海濱
驪龍方睡覺來嗔
弓墜入水無憂溺
何不頻呼甲子神

題程生畫九龍圖

雷起焦臺九龍吼
雲散鄭門兩蛇鬪
絳綃西射落青綃
倒捲瀛濤入天牖
程生神筆追所翁
毫端疑有風雲通
我失珍圖灰劫火
至今常夢秋潮紅
子家藏陳所翁九龍圖畫極爲偉南
田所賞癸丑秋敝廬火遂失之故南田贈先子詩有燒却珍圖雲氣散天吳今訝海潮紅之句

江邨學士去年秋陳情終養歸里奉寄此詩兼索
編珠新刻

裏拂秋風畫錦歸熙春正好賦閒居紅鵝不換臨王帖
白鹿雙扶御母輿未見詩頒青鏤管定知紙惜阜羅廚
十洲麟鳳新增記乞取編珠讀異書

臥病杜門作

凡生之徒十有三四肢九竅綜老聃

本韓非解

蟲臂鼠肝無

不可尻車神馬吾尤耽常無所以觀其妙常有亦以觀

其微

王伯厚云以有無字下斷句自王介甫始予頗然其創解

哀哉一息塞不通夜

臺月黑秋蟲叫繫馬坐馳遊何鄉主人出門蓬廬忘勞

我以生逸我病晝雨雙燕歸棲梁我聞上士閉心中閉
口下士閉門聊獨守

南齋遣興七首

雪碎梨花上已來層陰漠漠暗池臺輕雷似轆搖金井
靈雨如絲繡綠苔愁起漸隨苜蓿長春殘不及牡丹開
曲塘自遶流觴水誰暢幽情共舉杯

暫攝書齋豈易承羣蒙箇箇意飛騰新聲慣習伊涼弄
故態難將夏楚懲養疾放閒騎白鶴溺漉偷空捉蒼蠅
子輿自昔言三樂教育吾今謝不能

偶步東園水上亭長廊遮壁似圍屏低垂柳葉齊腰綠

倒挂松枝半面青
燕旣來時花盡放
牆當缺處月先經
莫因時過頻追悔
且酌紅螺瀉玉瓶

禪版經龕涉獵通
焚香掃地樂無窮
英雄莫恨垂頭老
恩怨都教放眼空
慧業漸消刻鵠後
心兵猶起鬪雞中
從今一悟無爲理
擊竹拈花處處同

文字因緣習未除
小乘畢竟隔眞如
逢場作戲閒情賦
與睡爲媒復性書
智鑒有時慙隰蟻
技窮嘗自笑黔驢
脩脩蝴蝶原眞覺
惠子無端戀五車

細茗新烹顧渚茶
單衫初試越溪紗
安心晝永夢參半
觸目興長詩漸加
隔院桐生雙集鳥
小池萍合一鳴蛙

此時青帝猶爲主只怕空庭落棟花

移坐南齋兩日閒
穴聞螳闐我心閒
偶然隱几雲生樹
最喜開窗月滿山
烏玉琢磨縑素壁
碧香筒罄染朱顏
明朝俯仰皆陳迹
率爾詩成未可刪

題轉菴上人小影

并序

轉公出身武舉少以豪俠聞輕財結客頗扞法禁
奏當論死用智逃免而潛從征吳逆屢立奇功大
將軍表奏特授陝西糧儲道丁艱歸服闋不仕
遂棄家爲僧于吳興之白雀結廬以居姓孫名旭
字子旦餘姚人

黃面老子誰寫真我一見之驚若神欲覓三心不可得
已空五蘊真絕倫四十九年廣長舌三十二相清淨身
示現宰官入濁世雲雷草昧施經綸親亾服終披毳衲
蓮華亭亭清出塵譬如神龍自潛躍變化風雨安能馴
靜中觀空悟夢幻一瓢一笠逃荒榛朱輪華轂遜徒步
芒鞋藤杖高垂紳巖樓川觀可終老雪溪水綠何山春
我相天下士幾輩眼中所見無此人一向多聞缺道力
半生自悔多迷津公偶開示輒了了黃花翠竹皆良因
魚山曾讚曹子建白社尙許劉遺民義諦頗厭青龍疏
解結何必波羅經他年從公證法忍容吾披髮騎麒麟

題仇十洲畫猿通臂下臨水

三峽無聲靜碧虛
志存流水豈求魚
藍田射虎將軍臂
何似臨淵一卷舒

春日同吳中山嵩沈雷臣中震數飲趙公子閒閒
軒時新築成雜詠六首

柳覆新軒草綠階
恰逢雨霽蹋桃鞵
頌成西第文誰諂
覆射東方語自諧
酒勝中山千日醉
人賢高士八關齋

中山長齋

風和晝靜春禽轉
此際真成散好懷

如海春光不費尋
幽居何必入山深
偶因事暇來觀帖
忽覺心清爲聽琴
白望青曹當檻睡
鉤輈格磔傷檐吟

韶華未許嘗畱駐秉燭歸時星滿林

又灑簾纖溼翠微合樽促坐酌空幃
韭青松鴨波稜美
筍白花豬蕈耳肥點水蜻蜓才一至
出檐蝙蝠尙孤飛
梨花寒食淒涼夜

時公子
喪偶

共醉華胥未忍歸

小築名園曲徑通魚鱗窗扇榻玲瓏
編籬破竹鳩羣匠
辱水挑泥來眾工砌護木香初見蕊
盆栽蘭蕙已成叢
赤闌干外湘簾捲夏日容吾領北風

摩腹難將寒具消攜朋散步滌煩囂
逐來駭鹿騰危坂
望去飛鳶入碧霄共說池中宜菡萏
還須石畔種芭蕉
花臺藥圃堪經畫也勝浮沈隱市朝

後樂山頭散碧烟每來登眺喜春妍絳桃烘日人如醉
紺蝶凌風竟欲仙遶郭遠聞吹簾栗隔牆時見舞鞦韆
此情豈待滄桑改過眼流光已惘然

暮春遊閒閒軒書示學徒

蝶舞蜂飛處處忙得時萬物競乘陽亭前花草添琴韻
牆外樓臺入鏡光但有魚跳喧水岸更無猴戲攪山莊
時一猴逸去窗明几淨攤書讀何假深宵月照牀

題高雲客鶴券圖

獨坐荒山濱清泉激哀弄梧桐吹素悵秋空息羣動月
來何遲遲天風默相送孤鶴踟足眠正入幽人夢

園中有捕蛙蛇者口拈戒之

虺雖有毒莫吾加兩部鳴時可當笳不見風流玉川子
直將家口認蛇蛙

表節詩

并序

爲七閩唐嶼諸生林國奎妻鄭氏作鄭氏夫死守
節有郎叔文芳以言挑之氏怒割左耳告于宗老
杖之又爲謾言投其子書簾中氏見之大怒又割
右耳氏父煖訟于官卞中丞親鞠于轅門觀者數
千人杖文芳血臀荷校示眾民大說時夏旱是日
大雨氏俄而雙耳復生完好如初蓋天顯奇節古

今罕見事也雲客屬予爲詩以表之

五事配五行禮聽九所重世人竄不聰於卦

坎

爲耳痛

古有洗流人恥受莠言貢何況冰雪姿無端集囂訟謾
書千餘言鴟音豺聲闕白刃夜飛霜浩氣塞天空一割
復再割雙耳棄如葑鬼神鑒精誠江河助悲慟刻肌俄
復息今古誰伯仲桓楚王凝妻亦爲姦所中賴此百鍊
剛生氣肅羣動奄奄蜍志輩百骸備無用

銅鑲烏几爲同舍郎換去戲成二首

棐几由來慣筆傭馬肝

研名

鵲尾列西東作書久便險麋

黑染帙今愁丹漆紅蔡澤奪鬻憔悴日戴憑掣席笑談

中金堂玉室埋荒草何羨區區四角銅

鄧通山已不西開海上人猶逐臭來田舍有錢皆得達
書生無印亦堪哀魏宮鵲瓦波濤沒晉代駝峰荆棘埋
往覓故應銅狄在摩挲雙手莫空回

富平王謙若坐椅爲同舍郎竊去換以破藤戲成
高土牀穿雖可免青氍竊去太馮陵奪將煖席欺良友
安望綈袍贈舊朋株木困臀原有象蒺藜刺股此其徵
王恭身外無長物坐薦終同坐破藤

不平三首

半世空論漆與膠樂新棄故任紛呶古人自昔悲陰雨

天下於今盡勢交伐木山中聞蟪蛄張羅門外結蠨蛸
不平鳴其秋蟲發未許昌黎解孟郊

可惜清流恩濁涇芝蘭香染鮑魚腥絕交有論傷朱穆
割席何心效管寧白黑易迷三里霧參辰難合兩隅星
掉頭不顧從餘子獨對長松眼倍青

覆雨翻雲交道慚尋盟懶似再眠蠶仲翔恨少一知己
叔夜憤添七不堪女借獨光猶掃室猿探山果尙分甘
區區几席頻遭奪長想齊卿解左驂

戲友卜財

臭穢常從夢裏聞官占空瀆六爻文百縉赤側時雖尙

三品朱提眾所欣迷寶也須勤夜識阜財誰不想南熏
卜依隗照開青甕應見銅拌五百斤

題柴陞升舉杯白眼望青天圖

火雲變白秋蛆弱乾矢橛堅鑽力薄夏畦失勢如是觀
孤生悔蹋朱門腳

四句如廁成

阿誰放眼仰視天空無雲

碧四連卽欲推測無終極柴立中央心茫然心茫然舒
兩拳徑奉紅螺斟翠泉張口一吸醉欲眠白日墮山月
騰川清風蕭蕭吹我前驅炎已快昨日雨紫薇花底垂
瘡蟬我思沽酒囊無錢且廓兩眶看晚烟

清冷泉月光

銀輪團團澈千頃素波上下琉璃影藻荇參差浮太空
恍如霓裳羽衣凌秋風縈沙織瀾曲折通又如百千燈
照水晶籠游鯈跳珠光的皦是中疑近鮫人宅不然水
底有天春寂寂廣寒倒浸蟾蜍白君不見執熱趨炎困
毒淫夏畦對此生冰心

烈女孫秀姑歌

爲方伯作

秀姑居然烈丈夫弱女能將綱常扶盈盈十五冰雪膚
待年未字懷瑾瑜鄰有淫人逾登徒豔姿桃李生覲覲
狺狺吠虓綏綏狐叩門求火來擲揄怒嚙其指負痛逋
杉槽漆斛浴奧隅又伏檻下行穹窻手持其踵姑大呼

四鄰聞之驚且呼茗盃謝罪一何愚姑怒罵之聲悲鳴
一女力豈敵羣奴不姦不歇妖言污狗歌鼠舞成凶符
當爲厲鬼殺獬獬縫衣吞溲宵捐軀炎天棺薄屍不渝
如聞篤耨熏香鑪石葉艾納烟于于此事流傳天下無
詎止表異垂西湖中丞親讞行褒誅獄成奏當 帝曰
俞殲厥元凶身首殊建坊旌烈謹通都我作此歌何爲
乎承流宣化職在吾將以巾幗示楷模男兒墮地懸桑
弧誰甘芳名讓秀姑特揭此義昭師儒

是日高先生兆送表貞詩來而香積寺祥公夜爲
予作功德竟女生故以二者名之

祥本丹霞燒佛師

祥公已到法空地

位兆來碧海達夫詩虜衣未

脫非男子汝水無邊是女兒

反索充鄧攸二夢

詎學青琴夸嫵

媚不妨紫玉作門楣要知長大誰班蔡我久輕邕重叔皮

送方伯出獵

講武秋飛玉帖驄仰看白雁下青松知公不射驚禽客
良御無煩諫鄭龍

秋日醉登湖山絕頂同趙公子作

謝尚舟移牛渚月孟嘉帽落龍山風古人興到自有致
爽氣秋來殊不同公子邀遊餉山麓行廚進炙花豬肉

醉睡百旬中山酒口香七日防風粥徑躡履汗漫漈
遠嵐明滅烟光浮白雲黠黠低眉頭著衣染裾挽客畱
畢竟白雲畱不住同下羊牛入城去

方伯以陝揭十三經送貯杭州府學喜而作歌

三皇象春五帝夏秋象三王冬象霸東家至聖無可名
土王四時包天下世無六經昭日星昏昏萬古如長夜
經爲之經傳爲緯鄙儒高束辭無暇讀書不識忠孝字
何貴牙籤紬滿架戲車鼎躍咸補史

鹽鐵論

心織筆耕聊

代稼白首幾人窺全經張口雲霧甘出勝得小自滿同
井蛙裁讀數卷卽思罷又笑稽古桓春卿但以寵榮夸

同舍博聞篤志百無一士習枵頑吁可怕天水方伯質
勝文獨有崇儒興雅化攜來陝榻十三經付託廣文不
責價丁寧收貯曉秀才有志鈔謄許頻借中和樂職擬
王褒歌不能工略堪亞

藩中夜祭靈星以祈穀

田夫終歲不厭穰朱門酒肉臭道旁去年九月禾殺霜
括州疆半多翳桑穉恭眞是荒年穀開倉能止千家哭
靈星夜夜禱天田農丈人

星名

明天下熟

傅秀才以貧故辭婚中表戲書慰之

蕭簪不喜見婦人君不邇色無昏姻繇來潘楊最相睦

誰道崔盧非世親，告我有室豈不慕？
實苦無家困孤露。他年宰相待君爲，
今且鼻吸五斗醋。

本范質語

吳寶崖四十自壽六首次韻

東西日月聚雙輪，努力須乘彊健身。
一到暮年悲烈士，便虞壯志不如人。
僕依穎士卽知己，室有萊妻何患貧。
秋海怒濤歟山立，好垂龍伯釣鼈繆。

富貴乘危事，旣非困窮失志世。多譏大鵬擊水遂南徙，
六鷁逆風聊退飛。夷惠之間參可否，霸王相雜莫依違。
朝中尊位無君比，未許王章淚溼衣。

鷗鳴徒亂鳳凰音，志士偏來羣小侵。
蟻鼻便瑕希世寶，

龍鱗詎改歲寒心潔身未義投瓢隱選俗何甘懷石沈
七日南山未收霧蔚文敢憚入林深

筆耕心織慣爲傭蓮幙薇垣各相春那有文章驚海宇
却無冰炭到心胸翻雲世態難難合如水交情淡勝濃
惟我與君真耐久盤桓常共倚孤松

壯歲何愁去日多也防窗隙白駒過易投夸父鄧林杖
難返魯陽三舍戈黃絹何絲勤賞識青芝赤箭盡按羅
作人自是吾儕事莫負風檐鐵研磨

時寶崖閣
文學使院

紅螺未得引杯歡蒼兔徒教吮墨寬金粟飄香偏異地
冰輪散彩失同看交逢新者不如故盟屢尋兮亦可寒

詎有輸心分而背致身合在慶雲端

附原詩

富貴茫茫任轉輪一杯自壽樂閒身壯心偶動雞鳴旦
庸福應輸肉食人覓句未能除習氣擁書聊足傲清貧
今秋見說江潮大欲挽魚龍上釣緇

壯年失學計全非敢謝雌黃俗口譏放眼秋空鷗北徙
浩歌天闊鶴南飛身徒食粟愁無補母未嘗羹願旨違
又報鄰林香滿院一枝只染別人衣

誤著儒冠負賞音頭顱早怪二毛侵雕蟲差免無聞恥
伏蟄難言不動心墮阱陰機分巧拙揚帆快意有

浮沈老莊妙理新來悟物我相忘得趣深

浪遊久愧作人儒不及梁鴻暫賃春六度廬山窺面
目一番滄海盪心胸行裝略似秋雲淡歸興真成晚
岫濃惟有著書才未竭從今閉戶種長松

嶮巖世態閱人多一笑陰靈頃刻過覆手沈淵兼下
石負心入室竟操戈漸看交寡無書絕不待情遷有
崔羅賴得二三朋好在聯吟白日足消磨

西湖是處可追歡躡屐高秋眼界寬拔地奇峰雨後
上參天古桂月中看露灑翻厭金莖淺風急無愁玉
宇寒爛醉攜來葛陂杖仙璫冉冉出雲端

再次前韻六首寄寶崖

隨化遷流比彈輪雲蒸龍變患無身
會心流水誰同調抱膝窮廬尙有人
公膳雙雞徒得鄙士餐三韭未全貧
雲雷事業丁年奮未許秋江理釣緡

鶴長鳬短是耶非角馬童牛譽亦譏
既失水時安涸轍不張羅處任高飛
貴徵黃霧憂方大窮鬱青霞志未違
孟筍江魚堪入饌肯將萊服換朝衣

芳訊三時閒德音庭翻槁葉曉寒侵
風吹明月落殘夢雲斷碧山違素心
覺夢觀空齊得喪雌雄守道一升沈
索居近悟參同契仰視鴻飛樂亦深

買賦錢來足顧傭指困粟到費精春放言不共千人諾
雄辯能開萬古胸鹿柴春編新雉滿鳬花秋撥玉蛆濃
蕭疎略似泉明宅三徑還添七鬣松

東國羣驅瘠狗多西園四駕白驢過大君有命褫鞶帶
時斥兩墨吏季女斯饑笑荷戈晚達自宜同馬援朝華不幸
作甘羅粲花兼挾生花筆副在名山永不磨

歎老嗟卑意未歡吾生加長益難寬引商刻羽人無賞
拖粉施朱眾競看鳩鷄不知天宇闊鷄鵠暫避海風寒
君才十倍終須達龜策無煩鄭尹端

漫興六首仍次前韻寄寶崖

坎坎河干空伐輪乾坤老我不材身未能高建雲臺議
聊作卑棲蓬戶人本是醒狂何必酒旣多慧業却宜貧
近來偶學詹何釣獨繭絲抽可作緼

物論齊時泯是非東姸西醜任褒譏肱經九折猶常技
翼斂三年總不飛鸛鶴研焚奇字絕鷄鶩冠著勢交違
自甘裋褐同吾友不羨新裁楚製衣

黃鸝深柳弄春音毛杜

會侯湘草

同遊樂事侵青箬舟中頻

載酒赤欄橋上共談心蕭條北里笙竽散寂寞南皮瓜
李沈十載流光如電沫尙畱詩句繫情深

交情險薄愧耕傭惕惕憂心亂似春賣友鋒鉞惟掉古

面朋鱗甲忽生胸繁星白黑隨碁變貝錦丹黃染素濃
猶賴故人金石固難將榮悴議長松

等閒投筆策勳多戰骨凌霜狐兔過紫塞秋風飄斷鏃
玉門荒草冷遺戈山吟雲護青絲履月詠花牽白縠羅
消受半生不律健彊於十萬劒橫磨

譚忿何須種合歡兩人心地本來寬弗迷風雨平生志
欲識英雄細行看田鼠盡除猶有餒冰蠶罷織始無寒
吾衰甚矣君方壯一論行藏感百端

望晴

馮脩長育浸淫久俯倭蘭郝

黍神名

爛且朽銷糟歎醜苦

無嗟三冬何絲開笑口無酒賴有穀養人
芄芄穰穰千

原新良月銓艾望晴旭百室盡禱庸天神

春秋佐助期
栗神名許給

大姓庸

入冬無衣食人甚多愴然有作

閭左人多辟穀軀柏羊難捋第三珠

事詳幽
冥錄

更憐葛帔

西華冷愁聽山頭叫雪姑

夢沈方舟索筆戲書

婦鍾
能詩

重陽傳統妻銘菊元日劉臻妻頌椒君索生花應疊和
可能分暇遠山描

湯西崖妻劉輓辭用東坡挽孔毅父妻韻

憶君初結褵正及弱冠歲和比五味調醢醢隨梅濟贈
佩及友朋舉案如兄弟禦冬秋蓄旨鴉炙太早計女非
阿承醜壻高樂廣世濤妻忍饑寒脫布換華袂一隨玉
堂遊忽作金仙逝誰知別鵠傷又觸牛衣涕幾人鶴髮
齊不獨蛾眉脆文傳位儷重絕勝璫璣瘞

寄雲客述意時游甬東并索近著四首

碧水當年仰臥龍明湖邂逅識儒宗揆天筆自昭銀漢
擲地聲應震景鐘如讀古詩風雅頌沉淹吾地夏秋冬
雲亭咫尺言隔不及俟芭載酒從

天畱一老重全閩行遯逍遙靜者身矍鑠漫攜靈壽杖

鬚眉如見義熙人登山觀海心猶壯友月朋風性久馴
頭白三公貪布被笑他無賴是平津

執轡夷門事已空中庭結轡禮猶同

張中丞雅敬雲客

當茲上

下無交日猶見公卿下士風按劍突如來白璧作琴幸
甚出焦桐昌黎旣與文昌善可許移書李浙東

到處探幽兼擇交又游甬海看騰蛟將軍揖客虛前席

時訪

馬侯太守先迎及近郊叔敬著書成七序仲翔布易飲

三爻遲君歸示驚人句鴻寶當煩十吏鈔

十月望日有懷彭無山先生

我所思兮在古賢愛而不見心纏綿誰不知名彭無山

渴夢蘊結二十年今來咫尺覲面艱如水中馬陸地船
但有意氣難自前神交要自通山川亦有貌合心不然
舉頭見月光滿天

短歌風蕭山令

杜守一爲蕭山令負子渡江虎出境哀哉稅侯信賢父
生男非羊猛於虎我作此歌不能長泰山婦人增悲傷
客自北來言優孟事漫成二首

優孟搖頭笑絕纓吞刀能使眩幻人驚面非高麗偏能
舞愁聽花甄謝豹鳴

青眼步兵禰阮瑀白頭元彥祖譙周烏衣子弟今如此

胡狗當年不用羞

觀八陣圖有感老杜遺恨失吞吳之句

蜈蚣畏蝦蟇蟇復畏蛇蛇畏蜈蚣食三蟲聚一家各
懷吞噬意莫敢毒先加三者若并一其一供爪牙物理
有固然人情諒非遐號滅虜公寒楚亡燕丹嗟如何昭
烈帝脣齒自杈桡蜀西吳在東各霸天一涯漢賊不兩
立吳宐通聘嘉奇兵連江漢乃可出褒斜堂堂祁山師
掎角方無瑕悲哉諸葛公食少事紛拏未得利一戰先
已疲三巴天意復不祚虎將如艾麻吞吳信遺恨此豈
謀臣差大星霄中壘八石埋寒沙

除夕戲題十美圖三絕句

今日日已除，
揭來促題畫。
如入連昌宮，
眾說開元話。
明皇十眉圖，
此中不得一。
想見舊時容，
老女注冬的。
昭君冰雪肌，
畫手狼藉爲。
或以好德心，
重爲君子期。

題三望圖

已矣猶三望，
披圖見此心。
如何行役者，
只向魏風吟。

解春集詩鈔卷三